

UPUTSTVO ZA PACIJENTA

ULCOSAN® 20 mg kapsule, tvrde *omeprazol*

Prije upotrebe pažljivo pročitajte ovo uputstvo, jer ono sadrži informacije koje su važne za Vas!

- Uputstvo sačuvajte. Možda ćete željeti ponovo da ga pročitate.
- Ako imate dodatnih pitanja, обратите se ljekaru ili farmaceutu.
- Ovaj lijek je propisan lično Vama i ne smijete ga dati drugima. Drugima ovaj lijek može štetiti čak i ako imaju znakove bolesti slične Vašima.
- Ako Vam se javi bilo koje neželjeno djelovanje, обратите se Vašem ljekaru ili farmaceutu. To uključuje i svako moguće neželjeno djelovanje koje nije navedeno u ovom uputstvu. Vidite dio 4.

U ovom uputstvu možete pročitati:

- 1. Šta je ULCOSAN i za šta se primjenjuje**
- 2. Šta morate znati prije nego što počnete primjenjivati ULCOSAN**
- 3. Kako primjenjivati ULCOSAN**
- 4. Moguća neželjena djelovanja**
- 5. Kako čuvati ULCOSAN**
- 6. Sadržaj pakovanja i druge informacije**

1. Šta je ULCOSAN i za šta se primjenjuje

ULCOSAN sadrži aktivnu supstancu omeprazol. Omeprazol pripada grupi lijekova koji se zovu "inhibitori protonske pumpe". Ovi lijekovi djeluju tako što smanjuju količinu kiseline koju stvara Vaš želudac.

ULCOSAN se primjenjuje za liječenje stanja kao što su:

U odraslih:

- Gastroezofagealna refluksna bolest (GERB). To je stanje u kojem se kiselina iz želuca vraća u jednjak (cijev koja povezuje grlo sa želucem) uzrokujući bol, upalu i žgaravicu;
- Čirevi u području gornjeg dijela crijeva (čir na dvanaestopalačnom crijevu) ili želuca (čir na želucu);
- Čirevi koji su inficirani bakterijom koja se zove *Helicobacter pylori*. U tom slučaju, Vaš ljekar će Vam možda propisati i antibiotike, koji će izlječiti infekciju i tako omogućiti zacjeljenje čira;
- Čirevi uzrokovani lijekovima koji se zovu nesteroidni antiinflamatorni/protuupalni lijekovi (NSAIL). ULCOSAN se, također, može koristiti za sprečavanje nastanka čireva u toku primjene nesteroidnih antiinflamatornih lijekova;
- Previše kiseline u želucu, što je uzrokovano izraštajem (tumorom) u gušteraci (Zollinger-Ellisonov sindrom).

U djece:

Djeca starija od 1 godine i s tjelesnom težinom ≥ 10 kg:

- Gastroezofagealna refluksna bolest (GERB). To je stanje u kojem se kiselina iz želuca vraća u jednjak (cijev koja povezuje grlo sa želucem) uzrokujući bol, upalu i žgaravicu. U djece simptomi ovog stanja mogu uključivati i vraćanje želučanog sadržaja u usta (regurgitacija), povraćanje i slab porast tjelesne težine.

Djeca starija od 4 godine i adolescenti:

- Čirevi koji su inficirani bakterijom koja se zove *Helicobacter pylori*. U tom slučaju ljekar će možda Vašem djetetu propisati i antibiotike koji će izlječiti infekciju i tako omogućiti zacjeljenje čira.

2. Šta morate znati prije nego što počnete primjenjivati ULCOSAN

Nemojte primjenjivati ULCOSAN:

- Ako se alergični (preosjetljivi) na omeprazol ili na bilo koji drugi sastojak ovog lijeka (navedeni su u dijelu 6).
- Ako ste alergični (preosjetljivi) na lijekove koji sadrže druge inhibitore protonske pumpe (npr. pantoprazol, lansoprazol, rabeprazol, esomeprazol).
- Ako primjenjujete lijek koji sadrži nelfinavir (primjenjuje se za liječenje HIV infekcije).

ULCOSAN nemojte primjenjivati ako se bilo šta od prethodno navedenog odnosi na Vas. Ako niste sigurni, prije primjene ULCOSANA obratite se Vašem ljekaru ili farmaceutu.

Upozorenja i mjere opreza

Razgovarajte sa Vašim ljekarom ili farmaceutom prije primjene ULCOSANA.

ULCOSAN može prikriti simptome drugih bolesti. Stoga, ako Vam se prije početka ili u toku liječenja ULCOSANOM dogodi bilo šta od sljedećeg, odmah se обратите Vašem ljekaru:

- Ako značajno gubite na tjelesnoj težini bez jasnog razloga i imate probleme s gutanjem;
- Ako imate bol u želucu ili lošu probavu;
- Ako počnete povraćati hranu ili krv;
- Ako imate crnu stolicu (stolica s primjesama krvi);
- Ako imate teški ili uporan, dugotrajni proljev, s obzirom na to da je omeprazol povezan s malim povećanjem javljanja infektivnog proljeva;
- Ako imate teške probleme s jetrom;
- Ako ste ikada imali kožnu reakciju nakon liječenja lijekom sličnim ULCOSANU, koji smanjuje želučanu kiselinu;
- Ako trebate uraditi posebnu krvnu pretragu (hromogramin A).

Ako ULCOSAN primjenjujete kroz dugi vremenski period (duže od jedne godine), Vaš ljekar će Vas vjerovatno držati pod redovnom kontrolom. O bilo kojim neuobičajenim simptomima ili okolnostima koji se javi, trebate obavijestiti Vašeg ljekara kad god ga posjetite.

Primjena inhibitora protonske pumpe, poput ULCOSANA, posebno kroz period duži od jedne godine, može blago povećati rizik od loma kuka, ručnog zglobova ili kičme. Recite Vašem ljekaru ako imate osteoporozu ili primjenjujete kortikosteroide (to može povećati rizik od osteoporoze).

Ako Vam se pojavi osip na koži, posebno na područjima izloženim suncu, obavijestite Vašeg ljekara što prije je moguće, jer ćete možda trebati prekinuti liječenje ULCOSANOM. Također, nemojte zaboraviti da spomenete i bilo koje druge neugodne učinke, poput bolova u Vašim zglobovima.

Dječa

U neke djece s hroničnim bolestima možda će biti potrebno dugotrajno liječenje, iako se ne preporučuje. Nemojte primjenjivati omeprazol u djece mlađe od 1 godine ili s tjelesnom težinom < 10 kg.

Primjena drugih lijekova s ULCOSANOM

Obavijestite Vašeg ljekara ako primjenjujete, nedavno ste primjenjivali ili ćete primjenjivati bilo koji drugi lijek, uključujući i lijek koji se nabavlja bez ljekarskog recepta. To je zbog toga što ULCOSAN može utjecati na djelovanje nekih lijekova, a i neki lijekovi mogu utjecati na djelovanje ULCOSANA.

ULCOSAN nemojte primjenjivati ukoliko već primjenjujete lijek koji sadrži **nelfinavir** (za liječenje HIV infekcije).

Recite Vašem ljekaru ili farmaceutu, ako primjenjujete bilo koji od sljedećih lijekova:

- Ketokonazol, itrakonazol, posakonazol ili vorikonazol (za liječenje infekcija uzrokovanih gljivicama);
- Digoksin (za liječenje srčanih problema);
- Diazepam (za liječenje uznemirenosti/anksioznosti, epilepsije, ili za opuštanje mišića);
- Fenitoin (primjenjuje se kod epilepsije). Ako Vi primjenjujete fenitoin, Vaš ljekar će Vas nadzirati prilikom započinjanja ili prekidanja primjene ULCOSANA;
- Lijekove za razrjeđivanje krvi, kao što su varfarin i drugi blokatori vitamina K. U ovom slučaju moguće je da ćete biti pod nadzorom Vašeg ljekara kada budete započinjali ili prekidali primjenu ULCOSANA;
- Rifampicin (za liječenje tuberkuloze);
- Atazanavir (za liječenje HIV infekcije);
- Takrolimus (primjenjuje se u nekim slučajevima transplantacije organa);
- Kantarion (*Hypericum perforatum*) (za liječenje blage depresije);
- Cilostazol (za liječenje intermitentne kaudikacije, odnosno stanja praćenog bolovima i grčevima u nogama prilikom hodanja);
- Sakvinavir (za liječenje HIV infekcije);
- Klopigidogrel (za sprečavanje stvaranja krvnih ugrušaka /trombova/);
- Erlotinib (za liječenje raka);
- Metotreksat (hemoterapijski lijek koji se u visokim dozama primjenjuje za liječenje raka). Ako Vi primjenjujete visoku dozu metotreksata, Vaš ljekar može privremeno prekinuti Vaše liječenje ULCOSANOM.

Ako Vam je Vaš ljekar pored ULCOSANA propisao i antibiotike amoksicilin i klaritromicin, za liječenje čireva uzrokovanih *Helicobacter pylori* infekcijom, veoma je važno da mu kažete ako primjenjujete bilo koji drugi lijek.

Primjena hrane i pića s ULCOSANOM

Vidite dio 3.

Trudnoća, dojenje i plodnost

Ako ste trudni ili dojite, mislite da biste možda mogli biti trudni ili planirate trudnoću, prije primjene ovog lijeka upitajte Vašeg ljekara ili farmaceuta za savjet.

Omeprazol se izlučuje u majčino mlijeko, ali nije vjerovatno da će utjecati na dijete ukoliko majka primjenjuje terapijske doze ovog lijeka. Ako ste Vi dojilja, Vaš ljekar će donijeti odluku o tome da li Vi možete primjenjivati ULCOSAN.

Upravljanje vozilima i mašinama

Nije vjerovatno da će ULCOSAN utjecati na Vašu sposobnost upravljanja motornim vozilima i rukovanje mašinama. Neželjena djelovanja poput omaglice i smetnji vida mogu se javiti (vidite dio 4.). Ako se to desi Vama, onda Vi ne biste trebali upravljati vozilima i rukovati mašinama.

Ostala upozorenja

ULCOSAN 20 mg kapsule, tvrde, sadrže saharozu (vrsta šećera). Ako Vam je ljekar ranije rekao da imate bolest tzv. nepodnošenja nekih šećera, prije nego što počnete primjenjivati ovaj lijek posavjetujte se sa Vašim ljekarom.

3. Kako primjenjivati ULCOSAN

Ovaj lijek uvijek primjenjujte tačno onako kako Vam je rekao Vaš ljekar ili farmaceut. Ako niste sigurni, provjerite s Vašim ljekarom ili farmaceutom.

Vaš ljekar će Vam reći koliko kapsula trebate primjenjivati i koliko dugo. To će zavisiti od Vašeg stanja i Vaše dobi/uzrasta.

Uobičajene doze navedene su u tekstu koji slijedi:

Odrasli

Liječenje simptoma gastroezofagealne refluksne bolesti (GERB), poput žgaravice i regurgitacije kiseline:

- Ako Vam je Vaš ljekar pronašao mala oštećenja na jednjaku, preporučena doza je 20 mg, jedanput na dan, u trajanju od 4 do 8 sedmica. Vaš ljekar Vam može savjetovati da dozu povećate na 40 mg i liječenje nastavite dalnjih 8 sedmica, ako oštećenja na Vašem jednjaku još nisu zacijelila;
- Kada oštećenja na jednjaku zacijele, preporučena doza je 10 mg, jedanput na dan;
- Ako Vaš jednjak nije bio oštećen, preporučena doza je 10 mg, jedanput na dan.

Liječenje čireva u gornjem dijelu crijeva (čir na dvanaestopalačnom crijevu):

- Preporučena doza je 20 mg, jedanput na dan, u trajanju od 2 sedmice. Vaš ljekar Vam može savjetovati da nastavite primjenu iste doze lijeka daljnje 2 sedmice, ako čir još nije zacijelio;
- Ako čir nije sasvim zacijelio, doza može biti povećana na 40 mg, jedanput na dan, u trajanju od 4 sedmice.

Liječenje čireva na želucu:

- Preporučena doza je 20 mg, jedanput na dan, u trajanju od 4 sedmice. Vaš ljekar Vam može savjetovati da nastavite primjenu iste doze lijeka daljnje 4 sedmice, ako čir još nije zacijelio;
- Ako čir nije potpuno zacijelio, doza može biti povećana na 40 mg, jedanput na dan, u trajanju od 8 sedmica.

Sprečavanje ponovnog nastanka čireva na dvanaestopalačnom crijevu i želucu:

- Preporučena doza je 10 mg ili 20 mg, jedanput na dan. Vaš ljekar Vam može povećati dozu na 40 mg, jedanput na dan.

Liječenje čireva na dvanaestopalačnom crijevu i želucu uzrokovanih primjenom nesteroidnih antiinflamatornih lijekova (NSAIL):

- Preporučena doza je 20 mg, jedanput na dan, u trajanju od 4 do 8 sedmica.

Sprečavanje nastanka čireva na dvanaestopalačnom crijevu i želucu u toku primjene nesteroidnih antiinflamatornih lijekova (NSAIL):

- Preporučena doza je 20 mg, jedanput na dan

Liječenje čireva uzrokovanih *Helicobacter pylori* infekcijom i sprečavanje njihovog ponovnog nastanka:

- Preporučena doza je 20 mg, dva puta na dan, u trajanju od jedne sedmice.
- Vaš ljekar će Vam, također, propisati i dva od sljedećih antibiotika: amoksicilin, klaritromicin i metronidazol.

Liječenje viška kiseline u želucu uzrokovanih izraštajem (tumorom) u gušteriči (Zollinger-Ellisonov sindrom):

- Preporučena doza je 60 mg, jedanput na dan.
- Vaš ljekar će prilagoditi dozu u zavisnosti od Vaših potreba i također odlučiti koliko dugo trebate primjenjivati lijek.

Primjena u djece i adolescenata

Liječenje simptoma gastroezofagealne refluksne bolesti (GERB), poput žgaravice i regurgitacije kiseline:

- Djeca starija od 1 godine i s tjelesnom težinom od 10 ili više kg mogu primjenjivati omeprazol. Doze za djecu temeljene su na njihovoj tjelesnoj težini, a ljekar će odlučiti koja je doza ispravna.

Liječenje čireva uzrokovanih *Helicobacter pylori* infekcijom i sprečavanje njihovog ponovnog nastanka:

- Djeca starija od 4 godine mogu primjenjivati omeprazol. Doze za djecu temeljene su na njihovoj tjelesnoj težini, a ljekar će odlučiti koja je doza ispravna.

- Ljekar će, također, Vašem djetetu propisati i dva antibiotika, koji se zovu amoksicilin i klaritromicin.

Način primjene

- Preporučuje se kapsule primijeniti ujutro.
- Kapsule možete primijeniti uz hranu ili na prazan želudac.
- Kapsule progušajte cijele, s pola čaše vode. Kapsule nemojte žvakati, niti drobiti, jer one sadrže granule (pelece) koje imaju omotač, koji ih štiti od djelovanja kiseline u Vašem želucu. Veoma je važno ne oštetići granule (pelece).

Šta učiniti ako Vi ili Vaše dijete imate problem s gutanjem kapsula

- Ako Vi ili Vaše dijete imate problem s gutanjem kapsula:
 - Otvorite kapsulu i progušajte njen sadržaj s pola čaše vode ili sadržaj kapsule rastvorite u čaši negazirane vode, u bilo kojem kiselom voćnom soku (npr. sok od jabuke, narandže ili ananasa) ili u kaši od jabuke.
 - Priredjenu mješavinu uvijek promiješajte prije nego što je popijete (mješavina neće biti bistra). Nakon toga, mješavinu popijte odmah ili unutar perioda od 30 minuta.
 - Da biste bili sigurni da ste popili cjelokupnu količinu lijeka, dolijte još pola čaše vode i to popijte. Čvrsti djelići sadrže lijek - nemojte ih žvakati ili drobiti.

Ako primijenite više ULCOSANA nego što ste trebali

Ako ste primijenili veću količinu lijeka od propisane, odmah se javite Vašem ljekaru ili farmaceutu.

Ako ste zaboravili primijeniti ULCOSAN

Ako ste zaboravili primijeniti dozu, uzmite je čim se sjetite. Međutim, ako je već blizu vrijeme za sljedeću dozu, izostavite primjenu propuštene doze. Nemojte uzimati dvostruku dozu da biste nadoknadjili dozu koju ste zaboravili primijeniti.

Ako prestanete primjenjivati ULCOSAN

Nemojte prekidati primjenu ULCOSANA prije nego što razgovorate sa Vašim ljekarom ili farmaceutom.

Ako imate bilo kakva dodatna pitanja u vezi s primjenom ULCOSANA, obratite se Vašem ljekaru ili farmaceutu.

4. Moguća neželjena djelovanja

Kao i svi drugi lijekovi, tako i ULCOSAN može izazvati neželjena djelovanja, ali se ona neće ispoljiti u svih osoba.

Ako primijetite/osjetite bilo koje od sljedećih rijetkih, ali ozbiljnih neželjenih djelovanja, prestanite s primjenom ULCOSANA i odmah se javite ljekaru:

- Iznenadnojavljanje zvuka sličnog zviždanju prilikom disanja, oticanje usana, jezika, grla ili tijela, osip, nesvjesticu ili otežano gutanje (teška alergijska reakcija);
- Crvenilo kože praćeno plikovima ili ljuštenjem. Također, mogu nastati veliki plikovi i krvarenje u području usana, očiju, usta, nosa i genitalija. Postoji mogućnost da je to Stevens-Johnsonov sindrom ili toksična epidermalna nekroliza;
- Žutu kožu, tamnu mokraću i umor, što mogu biti simptomi problema s jetrom.

Druga neželjena djelovanja uključuju:

Česta neželjena djelovanja (mogu se javiti u do 1 na 10 osoba):

- Glavobolja;
- Efekti na želudac ili crijeva: proljev, bol u želucu, zatvor (konstipacija), vjetrovi (flatulencija);
- Mučnina ili povraćanje;

- Benigni (dobroćudni) polipi na želucu.

Manje česta neželjena djelovanja (mogu se javiti u do 1 na 100 osoba):

- Oticanje stopala i gležnjeva;
- Poremečen san (nesanica);
- Omaglica, osjećaji trnaca poput „peckanja i bockanja“, osjećaj pospanosti;
- Osjećaj vrtoglavice (vertigo);
- Promjene u krvnim testovima kojima se provjerava rad jetre;
- Kožni osip, koprivnjača (urtikarija), svrbež kože;
- Opće loše osjećanje i manjak energije.

Rijetka neželjena djelovanja (mogu se javiti u do 1 na 1.000 osoba)

- Krvni poremečaji, poput smanjenog broja bijelih krvnih ćelija (leukocita) ili krvnih pločica (trombocita). To može uzrokovati slabost, pojavu modrica ili povećanu sklonost infekcijama;
- Alergijske reakcije, ponekad veoma teške, uključujući i oticanje usana, jezika i grla, vrućicu, zvuk sličan zviždanju prilikom disanja;
- Niski nivoi natrija u krvi. To može uzrokovati slabost, povraćanje i grčeve;
- Osjećaj uzbudenosti/agitiranosti, smetenosti ili depresije;
- Promjene okusa;
- Problemi s vidom, poput zamućenog vida;
- Iznenadna pojava zvuka sličnog zviždanju prilikom disanja ili kratkog daha (bronhospazam);
- Suha usta;
- Upala unutar usne šupljine;
- Infekcija koja se zove kandidijaza, koja može zahvatiti crijevo, a uzrokovana je gljivicom;
- Problemi s jetrom, uključujući i žuticu, što može uzrokovati žutu boju kože, tamnu mokraću i umor;
- Gubitak kose (alopecija);
- Osip po koži nakon izlaganja sunčevoj svjetlosti;
- Bolovi u zglobovima (artralgija) ili u mišićima (mijalgija);
- Teški problemi s bubrežima (intersticijalni nefritis);
- Pojačano znojenje.

Vrlo rijetka neželjena djelovanja (mogu se javiti u do 1 na 10.000 osoba):

- Promjene u krvnoj slici, uključujući i agranulocitozu (manjak bijelih krvnih ćelija/leukocita);
- Agresivnost;
- Viđenje, osjećanje ili slušanje stvari kojih zapravo nema (halucinacije);
- Teški problemi s jetrom koji dovode do zatajenja jetre i do upale mozga;
- Iznenadna pojava teškog osipa ili plikova ili ljuštenja kože. Ovo može biti udruženo s jakom vrućicom i bolovima u zglobovima (multiformni eritem, Stevens-Johnsonov sindrom, toksična epidermalna nekroliza);
- Mišićna slabost;
- Uvećanje grudi u muškaraca.

Nepoznata (učestalost ovih neželjenih djelovanja se ne može utvrditi na osnovu dostupnih podataka):

- Upala u crijevima (koja dovodi do proljeva);
- Ako se liječite ULCOSANOM duže od tri mjeseca, nivoi magnezija u Vašoj krvi mogu opasti. Niski nivoi magnezija mogu se ispoljiti kao umor, nevoljne mišićne kontrakcije, dezorientacija, konvulzije, omaglica ili ubrzani rad srca. Ako Vam se javi bilo koji od ovih simptoma, odmah se obratite Vašem ljekaru. Niski nivoi magnezija, također, mogu dovesti do snižavanja nivoa kalija ili kalcija u krvi. Vaš ljekar može odlučiti da Vas redovno upućuje na pretrage krvi zbog praćenja nivoa magnezija;
- Osip, koji može biti praćen bolom u zglobovima.

ULCOSAN može u veoma rijetkim slučajevima utjecati na bijele krvne ćelije dovodeći do slabljenja imunog sistema. Ako imate infekciju sa simptomima kao što su vrućica s teško oslabljenim općim stanjem ili vrućica sa simptomima lokalne infekcije poput bolova u vratu, grlu ili usnoj šupljini, ili imate poteškoće pri mokrenju, Vi se morate posavjetovati s Vašim ljekarom što prije je moguće, kako bi se testiranjem Vaše krvi mogao isključiti nedostatak bijelih krvnih ćelija (agranulocitoza). U ovom slučaju veoma je važno za Vas da date informaciju o lijeku koji u tom periodu primjenjujete.

Prijavljivanje sumnje na neželjena djelovanja lijeka

U slučaju bilo kakvih neželjenih reakcija nakon primjene lijeka, potrebno je obavijestiti Vašeg ljekara ili farmaceuta. Ovo podrazumijeva sve moguće neželjene reakcije koje nisu navedene u ovom uputstvu o lijeku, kao i one koje jesu.

5. Kako čuvati ULCOSAN

ULCOSAN morate čuvati izvan dohvata i pogleda djece.

Čuvati na temperaturi do 30 °C, u zatvorenoj bočici.

Rok trajanja: 36 mjeseci.

ULCOSAN se ne smije upotrijebiti nakon isteka roka upotrebe navedenog na pakovanju.

6. Sadržaj pakovanja i druge informacije

Šta ULCOSAN sadrži

Aktivna supstanca je omeprazol.

Jedna ULCOSAN 20 mg kapsula, tvrda, sadrži: Omeprazola 20 mg

ULCOSAN 20 mg kapsule, tvrde, sadrže sljedeće pomoćne supstance:

magnezij karbonat laki, hidroksipropilcelulozu, dinatrij hidrogenfosfat dihidrat, kukuruzni škrob, talk, saharozu, šećerne pelece, hidroksipropilmetylcelulozu, eudragit L100 55, titan dioksid (E171), polisorbat 80, makrogol 6000, silicij dioksid koloidni i tvrdu želatinsku kapsulu.

Sastav tvrde želatinske kapsule: titan dioksid (E171) i želatina.

Kako ULCOSAN izgleda i sadržaj pakovanja

ULCOSAN 20 mg kapsule su duguljaste tvrde želatinske kapsule sastavljene od tijela i kapice. Tijelo i kapica kapsula su bijele boje. Veličina kapsula: 2. Sadržaj kapsula su pelece bijele ili gotovo bijele boje, okruglog oblika.

ULCOSAN 20 mg kapsule, tvrde su pakovane u bočice sa sadržajem 14 kapsula.

Režim izdavanja lijeka

Lijek se izdaje na ljekarski recept.

Proizvođač (administrativno sjedište)

Bosnalijek, farmaceutska i hemijska industrija, dioničko društvo, Jukićeva 53, Sarajevo, BiH

Proizvođač gotovog lijeka

Bosnalijek, farmaceutska i hemijska industrija, dioničko društvo, Jukićeva 53, Sarajevo, BiH

Nosilac dozvole za stavljanje gotovog lijeka u promet

Bosnalijek, farmaceutska i hemijska industrija, dioničko društvo, Jukićeva 53, Sarajevo, BiH

Broj i datum rješenja o dozvoli za stavljanje gotovog lijeka u promet

Ulcosan, kapsula, tvrda, 20 mg: 04-07.3-2-7844/20 od 01.10.2021.

Datum revizije uputstva
Oktobar/listopad 2021.